

Nacionalni tim BiH ostvario visoki plasman i oborio sopstveni rekord u međunarodnom radio-sportskom 2010 IARU HF Šampionatu

Cijenjeni,

Bosnia and Herzegovina Contest Club (BHCC - www.bhcc.ba) i Asocijacija radioamatera u BiH (ARABiH - www.arabih.net) Vas s ponosom i posebnim zadovoljstvom obavještavaju da su objavljeni konačni rezultati Svjetskog šampionata IARU-a za 2010. godinu u kojem je Bosne i Hercegovina kao država zauzela visoko 6. mjesto, što je nas dosadašnji najbolji uspjeh. (<http://www.arrl.org/files/file/ContestResults/2010/2010-IARU-QST.pdf>)

Za predstavljanje radioamatera BiH u jednom od najznačajnijih radijskih međunarodnih takmičenja, «IARU HF World Championship», organizirala se grupa radio-sportista sa teritorije cijele zemlje i učestvovala u međunarodnom terminu 10. juli, 12:00 GMT – 11. juli, 12:00 GMT 2010 u jedinstvenoj i tehničko-organizacijski najzahtjevnijoj takmičarskoj kategoriji uopšte, kategoriji nacionalnih HQ (Headquarters) stanica.

U ovom radijskom sportskom takmičenju, koje se održava u eteru, je pod identifikacijskom oznakom E7HQ za BiH uzelo učešće 38 takmičara raspoređenih u 12 timova na 10 lokacija širom Bosne i Hercegovine, i to: Prijedor, Modračko jezero, Mahmutovo brdo kod Sarajeva, Banja Luka, Nišići kod Olova, Škugrić kod Gradačca, Konjuh, Smetovi kod Zenice, Čvrsnica i Lipici-Majevica.

Operatorski timovi su sa radiostanica na ovim lokalitetima komunicirali sa ostatkom Svijeta na šest kratkotalasnih radioamaterskih opsega koristeći se telegrafijom (CW) ili telefonijom (SSB). Cilj takmičenja je ostvariti sto veći broj radio-veza sa takmičarima iz Europe, Amerike i ostalih kontinenata . Unutar nacionalne ekipe je 2010-e prvi put skoro u potpunosti ostvarena uvezanost u jedinstvenu lokalnu kompjutersku mrežu. Ovakva mreža omogućava visoki stepen harmonizacije i kontrole te dobru koordinaciju aktivnosti koje se sprovode na lokacijama.

Za 24 sata takmičenja je uspostavljeno fantastičnih 13,568 radio-veza, sto je vrjednovano s 18,492,208 poena. Ovaj visoki skor je doveo do toga da smo u završnom plasmanu iza sebe ostavili izuzetno jake i respektabilne ekipe Hrvatske, Rusije, Švedske, Slovenije, Litvanije, Latvije, Srbije...pa i Austrije, USA, Japana, Švicarske itd. Njemački tim se ponovo popeo na pobjedničko postolje, a ispred BiH su se našle još radioamaterske velesile Francuska, Italija, Engleska i Poljska.

Ovaj uspjeh pokazuje da se u tehniku, operatorsku vještinu i organizaciju uloženi trud, vrijeme i novac itekako isplatio. Pokazali smo da smo jedan snažan tim, tim koji se kvalificirao i kroz godine rada i priprema postao kompetetivan za najviše uspjehe na međunarodnoj radiosportskoj razini.

Simpatije za naš tim imali su i nekolicina kolega i prijatelja iz R. Srbije i R. Hrvatske, koji su nam se pridružili i ojačali ekipu. Koliko smo ozbiljno shvatili i pristupili ovom takmičenju, govori činjenica da su pripreme za isti trajale nekoliko mjeseci, te da je veliki broj radioamatera iz BiH koji žive u trećim zemljama planirao svoje godišnje odmore u BiH tako, da može sudjelovati u timu E7HQ. Na taj način dolazi pojačanje iz Italije, Njemačke, SAD-a, Džibutija, Francuske, Austrije...

Ovakav uspjeh organizacijskog rada BHCC-a dao nam je snage i elana da i u ovoj, 2011., godini uložimo sto više napora s ciljem ostvarenja možda i boljeg rezultata. Ocijenivši dosadašnji rad BHCC-a kao jako uspješan, Asocijacija radioamatera u BiH, koja je ugrađena u međunarodnu krovnu organizacijsku strukturu, IARU (International Amateur Radio Union) i ovaj put pripreme i organizaciju HQ takmičara povjerava BHCC-u, klubu koji okuplja radioamatere zaljubljenike u radijska sportska takmičenja. Napomene radi, BHCC čine operatori koji u pravilu ostvaruju zavidne rezultate u međunarodnim takmičenjima, grade kompleksne radiostanice sa zahtjevnim antenskim sistemima, te vladaju iskustvom, odgovarajućim znanjem i vještinama telekomunikacije, bez čega pomenuti poduhvat i rezultat ne bi bio moguć.

Ovom prilikom BHCC i ARABiH zahvaljuju svim pojedincima i institucijama koje su prepoznale značaj ovog vrlo specifičnog tehničkog hobija i na neki način podržale naše dosadašnje aktivnosti. Također se nadamo da njihova podrška neće izostati niti u 2011. godini.



**ASOCIJACIJA RADIOAMATERA U BiH
BOSNIA AND HERZEGOVINA CONTEST CLUB**